

## Headlines

- विश्व बैंक आसेआ नियुक्त निरपक्ख माहिर नै किशन गंगा ते रतले पनबिजली परियोजना गी लेइयै पाकिस्तान कन्ने चलै करदे मुद्दे पर भारत दे रमै दा समर्थन कीता ऐ।
- राजौरी दे बडहाल ग्रांस जित्थे अंजान वजह कारण 17एं लोकें दी मौत होई चुकी दी ऐ, गी कन्टेनमेंट जोन घोषित करी दिता गेआ ऐ, मुख सचिव होरें कन्टेनमेंट नियमें गी सख्ती नै लागू करने दा निर्देश दिता ऐ।
- मुखमंत्री होरें सैलसफा मैहकमे दे ट्रेकिंग रूट ते 2025 दा कलेंडर जारी कीता।
- विज्ञान ते टेकनालजी मंत्री सतीष शर्मा होरें आखेआ ऐ जे जम्मू-कश्मीर कश सौर उर्जा, जल ते नवीकरणीय उर्जा दा पूरा-पूरा इस्तेमाल करने दी समर्थ ऐ।
- ग्रामीण विकास मैहकमे दे सचिव होरें दस्सेआ ऐ जे जम्मू-कश्मीर नै प्रधानमंत्री ग्रामीण आवास योजना तैहत 85 प्रतिशत कोला मता लक्ष्य हासल करी लैते दा ऐ।

## World Bank Indus Treaty

विश्व बैंक आसेआ नियुक्त निरपक्ख विशेषज्ञ नै किशनगंगा ते रतले पनबिजली परियोजनाएं पर भारत दा समर्थन कीता ऐ। विशेषज्ञ नै पनबिजली परियोजनाएं दे बारे च पाकिस्तान आसेआ अपने मुद्दे पर विचार बटांदरा करने लेई मध्यस्थता अदालतै दी स्थापना करने पर पाकिस्तान दी याचिका गी खारिज करी दिता ऐ। भारत नै किशनगंगा ते रतले पनबिजली परियोजनाएं पर विचार करने लेई इक निरपक्ख विशेषज्ञ दी नियुक्ति दी गुजारिश कीती ही। विशेषज्ञ नै आखेआ जे उनें बड़ी सावधानी कन्ने विचार करने परैन्त इब्बी पाया ऐ जे उनें'गी दौनें मुखे बशकार मतभेद दे सब्बने बिंदुएं दे गुणे ते दोषे पर फैसला देने लेई अगगे बधना चाईदा। विदेश मंत्रालय नै आखेआ जे जम्मू कश्मीर च किशनगंगा ते रतले पनबिजली संयंत्रे कन्ने सरबंधत मतभेदे गी तय करने दी समर्थ छड़ी निरपक्ख विशेषज्ञ दे कोल ऐ ते इस मुद्दे पर भारत नै म्हेशां सैद्धांतिक रौंs अपनाया ऐ। मंत्रालय नै आखेआ ऐ जे दौनें पनबिजली परियोजनाएं दे सरबंधे च एह फैसला भारत दे इस रौंs गी स्हेई साबत करदा ऐ जे एहदे'ने सरबंधत 7 मुद्दे निरपक्ख विशेषज्ञ गी भेजे गे हे।

<><><><><><><><>

## Badhal Zone CS

राजौरी जिले दा बडाल ग्रांs, जित्थे पिछले कोई डेढ म्हीने दौरान 17 संदिग्ध मौतां होई चुकी दियां न, गी नियंत्रित यानि कन्टेनमेंट जोन घोषित करी दिता गेआ ऐ ते प्रभावित परिवारें दे मकानें गी सील करी दिता ऐ ते इलाके गी त्रऊं जोनें च बंडियै उत्थे सार्वजनिक जां निजी तौरा पर लोके दे किट्ठे होने पर बी बंदश लाई दिती गई ऐ। जांच कम्मै लेई नामजद अधिकारी इनें

इलाकें च लोकें गी उपलब्ध कराई जाने आहली रूट्टी ते होरनें चीजें पर तक्क रक्खोग। सहाडे जिला संवाददाता शक्ति शर्मा दी इक रिपोर्ट।

तोआई, मुख सचिव अटल डुल्लू होरें बडाल ग्रांs च कन्टेनमेंट नियमें गी सख्ती नै लागू करने दे निर्देश दिते न तां जे उत्थे अंजान वजह कारण होर कुसै जानी नुकसान कोला बचेआ जाई सके। सेहत, पुलस ते जिला अधिकारिएं कन्ने लग्गी दी इक उच्ची सतह दी बैठका च उनें जोर देइयै आखेआ जे इस इलाके च नियमें दी सख्ती नै अमलावरी लेई सुद्दी गिनतरी च अमला तैनात कीता जा ते शड़ा जांच कीती गेदी रूट्टी ते पानी दा इस्तेमाल कीता जाना यकीनी बनाया जा। मामले दी जांच जारी ऐ ते एहदे लेई खडेरी गेदी विशेष जांच टीम ते राष्ट्रीय निदान टीमां किट्ठे कीते गेदे नमूनें दी जांच करा करदे न।

<><><><><><>

CM-Calender

मुखमंत्री उमर अब्दुल्ला होरें कल जम्मू आहले सिविल सचिवालय च इक कार्यक्रम दौरान सैलसफा मैहकमे आसेआ तैयार कीते गेदे ट्रैकिंग दे नमें रस्टें ते 2025 बरे दा कलेंडर जारी कीता। एह इनें कलेंडरें च कन्थे पर टंग्गने आहले ते टेबलै पर रक्खने आहले दौनें किस्मै दे कलेंडर शामिल न जिंदे च जम्मू-कश्मीर दे बक्ख-बक्ख हिस्सें दे शैल सनाहकड़े कुदरती नजारे, सैलानी थाहरां ते इत्थूं दी सैलसफा, समर्थ दा छलैपा दिक्खेआ जाई सकदा ऐ। मैहकमे आसेआ जारी ट्रैंग रूट्टें च टकोहदा करियै कोलाहोए ग्लेशियर ट्रैक, खीऊ वास्तरवन, गुरेज-सोनोमर्ग ट्रैक,

सरबी बीअर वैली ट्रैक ते मरगन पास त्सोहर मर्ग ट्रैक गी परमुखता कन्नै उजागर कीता गेदा ऐ।

<><><><><><>

### Sakeena-Itoo BMMS

सेहत ते मेडिकल शिक्षा मंत्री सकीना इतू होरें सरकारी मेडिकल कालेज कठुआ दा दौरा लाया। ओह Bachelors of Homeopathic Medicine ते सर्जरी दे पैहले बैच लेई आयोजित कार्यक्रम च शामिल होइयां। BHMS दे 63 विद्यार्थिं दे पैहले बैच गी संबोधित करदे होई मंत्री होरें आखेआ जे एह इदारा अच्छे मेडिकल अमले गी बनाने च मदद करोग जेड़े जम्मू-कश्मीर च सेहत सरबन्धी स्हूलतें ते सेवाएं गी बेहतर करने च मरी करी सकन। इस मौके विद्यार्थिं मरीजें दी भलाई-बेहतरी ते पूरे उत्साह ते निष्ठा कन्नै उन्दा इलाज ते सेवा करने दा प्रण लैता।

<><><><><><>

### Doda-Arrest

डोडा पुलस नै एसएसपी संदीप मेहता हुंदी अगुवाई च इक बड्डी सफलता हासिल करदे होई नशीले पदार्थें दी तस्करी च शामिल इक महिला गी गिरफ्तार कीता ऐ। पुलस नै शूफिया जानकारी थहोने मगरा संदिग्ध गतिविधिं पर तक्क रक्खी दी ही। इक टकोहदी सूह थहोने मगरा प्रशासन नै इलाके च छापेमारी कीती ते उसी गिरफ्तार करी लैता। महिला दी पंछान गी सार्वजनिक नेई कीता गेआ ऐ। सहाड़े जिला संवाददाता कन्नै गल्ल करदे होई एसएसपी संदीप मन्हास होरें आखेआ।

<><><><><><>

## **Satish Energy**

साइंस ते टेकनालजी मंत्री सतीश शर्मा होरें आखेआ ऐ जे जम्मू-कश्मीर च सौर उर्जा, पानी ते परती-परतियै इस्तेमाल कीते जाई सकने आहले उर्जा दे संसाधनें दा पूरा-पूरा इस्तेमाल करने दी पूरी समर्थ मौजूद ऐ। राजस्थान दे जयपुर च नवीकरणीय उर्जा बारै आयोजित खेत्तरीय कार्जशाला गी संबोधित करदे होई मंत्री होरें प्रदेश दिऐं महत्वपूर्ण उपलब्धिऐं दा जिक्र करदे होई दस्सेआ जे पी.एम कुसुम योजना दे तैहत अजे तोड़ी 3 ज्हार सोलर पंप लाए जाई चुके दे न ते पी.एम सूर्य घर दे तैहत 37 मैगावाट छमता दे सौर पैनल सरकारी इमारतें पर लाए गे न। उनें अग्गे दस्सेआ जे पी.एम सूर्य घर मुफ्त बिजली योजना तैहत घरेलू रेणी च कोई 1 ज्हार घरें दिऐं छतें पर सोलर रूम टापिंग करी लैती गेदी ऐ। मंत्री होरें इस मौके जम्मू-कश्मीर लेई केंद्र थमां विशेष सहायता दा बी आग्रह कीता तां जे ग्रामीण इलाके ते बन्ने कन्ने लगदे इलाके च उर्जा ढांचे गी मजबूत बनाया जाई सकै।

<><><><><><>

## **Awareness Camp Muft Bijli**

परती-परतियै बरताने आहली अक्षय उर्जा गी बढ़ावा देने दे सरबंधे च बटोत थाहर प्रधानमंत्री सूर्य घर मुफ्त बिजली योजना बारै जागरूकता केंप दा सरिस्ता कीता गेआ। इस कार्जक्रम च मुकामी लोकें, पर्यावरण दी राखी हिफाजत कन्ने जुड़े दे लोकें ते गैर सरकारी संगठनें हिस्सा लेता। एहदा मकसद इस सकीम थवां होने आहले लाह गी उजागर करना, बिजली दे बिल गी घट्ट करना ते एहदे कन्नो-कन्नी सौर उर्जा गी अपनाइए पर्यावरण दा संरक्षण करना हा।

बिजली दी बंड सरंबधी JPDCL अधिकारिं छतें पर सौर पैनल लाने बारै व्यापक जानकारी उपलब्ध करोआई। इस स्कीम गी लेइए लोकें च खासा उत्साह दिक्खेआ जा रदा ऐ ते सारे इसी अपनाने दी अपील करा रदे न।

<><><><><><>

### **PMAY-G-Completion**

जम्मू-कश्मीर नै प्रधानमंत्री ग्रामीण आवास योजना तैहत 85 प्रतिशत दी दर कन्नै कम्म मुकम्मल करिये ग्रामीण इलाकें च मकान बनाने दे कम्मै च इक शानदार उपलब्धि हासल कीती ऐ। ग्रामीण विकास ते पंचैती राज मैहकमे दे सचिव मोहम्मद एजाज असद होरें इक्क जायजा मीटिंग च जम्मू-कश्मीर आसेआ पार कीते गेदे इक महत्वपूर्ण मील दे पत्थर दा जिक्र करदे होई पूरा भरोसा जताया जे पहाड़ी इलाकें च बड़ी मती ठंड आहले हालात दे बावजूद बी 31 मार्च तोड़ी बाकी रौहंदे कम्में गी बी तोड़ चाढ़ी लैता जाग। सचिव होरें दस्सेआ जे 2016 कोला लेइए हुनै तगर जम्मू-कश्मीर च इस योजना दे तैहत 3 लक्ख 35 जहार मकानें दी मंजूरी थहोई ऐ जिंदे चा 2 लक्ख 85 जहार मकानें दा कम्म पैहले गै सबूरा करी लैता गेदा ऐ।

<><><><><><>

### **Ramban-Traffic**

शिड़क सुरक्षा गी बदाने ते जम्मू-श्रीनगर राष्ट्रीय शिड़क एन.एच 44 पर हादसैं गी घट्ट करने दे मकसद कन्नै रामबन पुलस नै गड़डियां चलाने आहलें गी आखेआ ऐ जे ओह अपनी-अपनी लैन च चलन, खास करी किश टकोहदी थाहरें जियां दलवास, मेहर ते Maroge थाहर पर।

ड्राइवर ते होरनें दुएं यात्रिएं गी हिदायत कीती गई ऐ जे ओह सुरक्षा नियमें दी पालमा करन तां जे ऐसी थाहरें जित्थें हादसें दी शँका बनी दी रौहंदी ऐ, उत्थे हादसें गी घट्ट कीता जाई सकै। एहदे अलावा लोकें दी सुविधा लेई रामबन ट्रैफिक पुलस नै टोल फ्री नंबर बी जारी कीते देन ते लोक सोशल मीडिया मंच राएं बी उन्दे कन्नै राबता करी सकदे न। सहाड़े जिला संवाददाता कन्नै गल्ल करदे होई एसएसपी ट्रैफिक रामबन रोहित बसकोत्रा होरें आखेआ।

<><><><><><>